

La Lettre Jèrriaise Sanm'di lé seize du mais d'novembre 2024.

Bouônjour bouonnes gens. Ch'est Jean L'Maistre dé L'Éta tch'a l'pliaîsi dé vos présenter la lettre Jèrriaise aniet, Sanm'di lé seize du mais d'Novembre, deux milles vîngt-quatre.

Nos v 'là en pliein Hivé et bein vite j'allons nos trouver à Noué. J'crai bein qué ch'est p't-être l'âge, mais étout quand nous-'a un tas d'choses à faithe, lé temps s' pâsse hardi vite!

J'avons célébré, au mais d' Septembre, not' occasion d' rencontre annuelle auve les bouôns vièr Jèrriais, et tchiques jannes gens étout. Ch'tait à la Salle Pârrouaïssiale dé St Louothains grâce à madame Deidre Mezbourian qu'est Connêtabl'ye et j'étions eune chentaine à tabl'ye. J'eûnmes des r'citâtions, un mio d'rêvillon avec d'la musique par lé groupe tchi s'appelle Mêli-Mêlo et tchique chansons étout! Mèrcie à tous. Un raide bouon théé fut sèrvi par les membres dé la charité tchi s'appelle "Les Mains alentou du Monde"en Angliais "Hands Around the World". Mèrcie bein des fais à chu groupe.

J'eûnmes des beurrées, des morcieaux d' gâches et même des gâches dé lait d'beurre qué not' anmîn le sieur Peter Norman nos avait boulandgi spécialement dans sa tchuîsinne à St Brélade. Mèrcie Pierre.

Un grand mèrcie étout pour la râfliéthie si bein organisée par Winston et Maureen Lé Brun. J' eûnmes étout l'honneu d'aver la présence dé not' Bailli avec nous et j' l' érmèrcions d'être v'nu nos supporter.

J'avons ieu eune aut' célébration avec eune p'tite organisation tchi s'appelle L' Association Jersey - Cotentin et tchi fut formée i' y' a quarante ans.

L'histouaithe est intéressante, à m'n' opinion, pa'ce qué la preunmié Pâ-raisse à êt' jeunmellée était St Hélyi aue Avranches en mille neu chent quatre-vîngt deux. Tout ch'la fut c'menchi par l'ancien Sénateu Reg Jeune tch'avait rencontré l'ancien, et hardi bein connu en Nouormandie, Président du Département dé la Manche, lé Sénateu Jozeau-Marigné, à eune conféthence dé bantchièrs à Madrid. Les deux mèssieurs avaient résolu dé travailli ensembl'ye pour développer l'amiètchi entre vaîsîns.

P't-être par co-incidence, mais certainement en bouôn temps, le sieur Paul Barnes fut appointé par lé Département d' Éducâtion en Jèrri pour encouothagi l's écoles en Jèrri, dé développer les liens avec les écoles en Nouormandie.

À r'touôner à l' Association, en mille neu chents quatre-vîngt quatre ou portait lé nom L'Association Jersey - Coutançais. Après tchique années j'avions des membres au Nord et au Sud dé la Manche, pas seulement dé Coutances, et i' fallait changi l'nom à l' Associâtion Jersiais - Cotentin.

Pour nos célébrations ch't' année j'avions invité nos anmîns des Pâraisses Jeunmellés dé nos joindre et j'étions souaixante-trais à tabl'ye. J'eûnmes étout lé pliaîsi et l'honneu d'aver Moussieu lé Consul Honoraithe dé France à nos joindre.

Les activités de l' Associâtion sont, par exempl'ye, d' arrangi des rencontres deux ou traits fais par an, et dé temps en temps des viages en Nouormandie. L'année tchi veint, j'avons déjà èrchu eune invitâtion à participer à la Fête Normande lé treize, quatorze et l' tchînze du mais

d' juin à Bricquebec, pas bein liain dé Cart'ret.

Il' ont lé support du Conseil Général dé la Manche, et comme j'lé savons tous hardi bein, il' aiment bein lus Fêtes les Nouormands. Faites-mé à saver s'ous êtes întérêssis et j' pouôrrais vos passer les détails.

Eh bein n'en v'là assez pour aniet.

Mèrcie pour m'avait écouté et à la préchainé.